

**Incumbensa da la fracziun da la PS concernent il sustegn e l'integraziun da la giuventetgna durant la pandemia dal coronavirus (emprim sutsegnader Rettich)**

La pandemia mundiala dal coronavirus pertutga senza dubi tut ils umans. Cunzunt las persunas pli veglias èn pertutgadas fermamain, perquai ch'ellas han ina ristga da mort cleramain pli gronda. Per quest motiv èn ellas vegnidas e vegnan ellas – cun raschun – er vaccinadas sco emprimas.

Ils giuvenils na tutgan betg tar las gruppas da ristga dal coronavirus. Tuttina daventi pli e pli cler che la pandemia e sias circumstanzas han consequenzas considerablas per la sanadad, per il bainesser e per il svilup da las persunas giuvnas. Las psicologas ed ils psicologs d'uffants e da giuvenils sa fan quitads. Ellas ed els èn occupads fermamain e mussan che desperaziun, malsognas psicosomaticas sco er intenziuns seriusas da commetter suicidi s'augmentan tar uffants e giuvenils sur 12 onns (NZZ am Sonntag, 11-04-2021). In ferm augment dal basegn da cussegliaziun mussa er l'evaluaziun da 147.ch che vegn purschì da la Pro Juventute e che stat a disposiziun gratuitamain ad uffants e giuvenils. (PRO JUVENTUTE CORONA-REPORT: Consequenzas da la pandemia dal coronavirus per uffants, per giuvenils e per famiglias en Svizra: <https://www.projuventute.ch/sites/default/files/2021-02/Pro-Juventute-Corona-Report-DE.pdf>). Il destin tutga spezialmain quellas persunas ch'eran en situaziuns da vita difficilas gia avant la pandemia. Ellas n'han savens betg avunda resursas per dumagnar las grevezzas supplementaras ch'il coronavirus chaschuna. In'analisa che sa cumpona da pliras parts e ch'è vegnida fatga da la ZHAW davart il tema «La giuventetgna durant il temp da la pandemia dal coronavirus» (ZHAW: Jugend in Zeiten der Covid19-Pandemie, Ergebnisse einer Wiederholungsbefragung von Jugendlichen im Kanton Zürich, [https://digitalcollection.zhaw.ch/bitstream/11475/22094/3/2021\\_Baier-Kamenowski\\_Jugend-in-Zeiten-der-Covid19-Pandemie.pdf](https://digitalcollection.zhaw.ch/bitstream/11475/22094/3/2021_Baier-Kamenowski_Jugend-in-Zeiten-der-Covid19-Pandemie.pdf)) mussa en moda impressiunanta, co ch'il bainesser dals giuvenils è sa sviluppà. Ils problems emoziunals èn s'augmentads signifitgantamain, sch'ins cumpareglia las enquistas. Il stadi psychic dals giuvenils patescha, igl è da far quint cun in basegn da terapia pli grond e per part è in tal gia vegnì constatà.

Differentas partidas giuvnas (GISO, GVL, GPEV, Giuvens da l'Alleanza dal Center) èn sa drizzadas cun in appel en chausa al Cussegl federal. Il president da la Conferenza da las directuras e dals directurs chantunals da giustia e polizia (CDCGP), Fredy Fässler, ha sustegnì il fatg, che persunas giuvnas duajan vegnir integradas pli fitg en las proceduras da decisiun.

Per resumar sa mussi ch'igl exista in grond basegn d'agir, cumbain che la Svizra ha – en cumparegliaziun cun auters pajais – quasi adina tegnì avert las scolas e pia mantegnì dapli «normalità».

En quest connex pretendan las sutsegnadras ed ils sutsegnaders che la problematica vegnia drizzada immediatamain en moda cumplessiva, e quai en barat cun las organisaziuns grischunas da giuvenils (p.ex. Jugend.gr, Jubla, Cevi) sco er cun represchentants e represchentants da la giuventetgna sezza. I duain vegnir elavuradas mesiras che vegnan structuradas en mesiras a curta vista che sa laschan realisar svelto (p.ex. amplificaziun da las purschidas da cussegliaziun psicologica, participaziun dals giuvenils a las discussiuns politicas davart il coronavirus, agids finansials per studentas e students) sco er en mesiras a vista mesauna e pli lunga (p.ex. segirar socialmain las famiglias, serrar sistematicamain las largias da furnaziun ch'èn resultatadas tar las persunas pertutgadas, segirar plazzas da furnaziun, programs da barat). In focus spezial duai vegnir mess sin il sustegn da giuvenils/famiglias spezialmain dischavantiads. Igl è numnadamain in fatg incontestà che la pandemia ha anc extendì il foss socio-economic tar ils giuvenils.

Tavau, ils 21 d'avrigl 2021

**Rettich**, Caviezel (Cuira), Degiacomi, Atanes, Baselgia-Brunner, Cahenzli-Philipp, Degiacomi, Gartmann-Albin, Hofmann, Horrer, Müller (Favugn), Perl, Preisig, Rutishauser, Schwärzel, Wilhelm, Pajic, Spadarotto, Stieger, Tomaschett (Cuira), van Kleef